

## Ժ Ը

## ՔՐԻՍՏՈՍԻ ԸՄԲՈՆՄԱՆ ԵԿԵՂԵՑԻՆ ԳԵՅՍԵՄԱՆԻ ՄԷՁ

Աւետարանիչները կը պատմեն թէ (Մատթ. ԻՁ. 36-50, Մարկ. ԺԴ. 32-46, Դուկ. ԻԲ. 37-50, Յովհ. ԺԸ. 1-3) մեր Տէրը իր վերջին ընթրիքէն յետոյ գնաց Գեթսեմանի գիւղը իր աշակերտներով, որոնց ըսաւ որ հսկեն հոն, մինչև որ ինքն երթայ ազօթքը ընկուլ, իր հետ առնելով Պետրոսը և Զեբեդեայ երկու որդիները: Յիսուս սկսաւ տրտմիլ և հոգալ, և կ'ըսէ անոնց ալ թէ «տրտում է ոգի իմ մինչև ի մահ»: Ան քիչ մը առաջ կ'երթայ Զիթենեաց պարտէզ ըստեւած տեղը և հոն ազօթելով կ'ըսէ. «Հայր, եթէ կամիս անցո զբաժակս զայս յինէն, բայց ոչ իմ կամք՝ այլ քոյդ լիցի»: Երեք անգամ Յիսուս կու գայ աշակերտներուն մօտ և զանոնք քնացած կը գտնէ, երեք անգամ ալ կը յորդորէ որ արթուն մնան ու փորձութեան չենթարկուին, ու յետոյ կը յարէ «հոգիս յօժար է, բայց մարմինս տկար»: Երկրորդ և երրորդ անգամ կատարուած ազօթքէն յետոյ կը խօսի անոնց համանման խօսքեր: Ի վերջոյ, կ'ըսէ աշակերտներուն թէ «ննջեցէք այսուհետև և հանդերուք զի ահա հասեալ է ժամ և որդի մարդոյ մատնի ի ձեռս մեղաւորաց»: Տասներկուքներէն մին՝ Յուդա Իսկարիովտացին Յիսուսը կը մատնէ թշնամիներուն, և անոնք ալ կալանաւորելով զայն կը տանին Կայիափայլի մօտ դատելու և դատապարտելու համար:

Զիթենեաց պարտէզի մէջ այդ տագնապի պահուն, ինչպէս կը գրէ Աւետարանիչը, երկինքէն հրեշտակ մը երևցած էր Յիսուսի և քաջալերած էր զայն, երբ «հոսէին ի նմանէ քրտունք իբրև զկայլակս արեան, ոլուն ոլուն հեղեալ յերկիր»:

Յիսուսի՝ մեր Տիրոջ մահուան տագնապի ու Հօրը ուղղուած սրտառուչ ազօթքներուն՝ հանդիսավայրը եղող այս տեղերը, շատ կանուխէն բարեպաշտ քրիստոնեայք սրբացուցած և հոն ուխտատեղիներ շինած էին: Գեթսեմանիի մէջ քրիստոնէական առաջին դարերէն սկսեալ ցոյց կը տրուին վերջին գիշերը Փրկի-